

lis Gnovis

■ **BASILIAN.** La semblee da l'Economie solidarie

Cuntun confront public, li de Cjase de Vicinie di Varian, ai 29 di Otubar, e je stade screade la «Comunitât da l'Economie solidarie dal Friûl di Mieç», ch'è cjaparà dentri dutis lis vilis dal Ambit sociâl e assistenzial «Medio Friul» e ch'è operarà par meti in vore i principis de Leç regionâl 4 dal 2017. I partecipants si son dâts dongje cul intindiment di «smirà l'atuazion dai principis di solidarietât, di mutualitât, dal don e dal rispiet dal ambient» ch'a coventin par garantì il bonstâ des Comunitâts dal teritori. Di ch'è strade, a son stadis presentadis lis ativitâts za inviadis dal «Distret di Economie solidarie» e cul proget «Pan e Farine dal Friûl di Mieç» e si à discorût sul proget par recuperà il vieri «Consorzio Agrario» di Basilian, ch'al deventarà l'abitanza dal «Distret di Economie solidarie».

■ **CORMONS.** Il Marimont, seont Salgado

Lis fotografis splendidis di Sebastião Salgado dedicadis ai «Sem Terra» dal Brasil a tornin a jessi esponudis, in grazie de colaborazion fra «Caritas» parochial e Unitât pastorâl di Cormons, Cumon e «Pro loco», e «Gruppo '89» di San Zuan di Manzan, ch'al ten cont la copie furlane de mostre internazionâl «Terra». L'esposizion dal «fotograf umanist» brasilian e restarà imbastide li dal Museu civic comunês dai 28 di Otubar ai 20 di Novembar, cu lis visitis viertis di vinars e di sabide (16-19); e domenie (10.30-12.30 / 16-19). L'iniziativa e jentre fra lis ativitâts inmaneadis par prudelâ il proget di solidarietât internazionâl «Pachamama - Bolivie» dal Centri pal volontariât internazionâl «CeVi».

■ **UDIN.** L'ingjan de "Transizion ecologjiche"

Paolo Cacciarì, il gjornalist venit, espert di Economie solidarie e alternative, al tome a Udin, inviadât dal Comitât «Stop Ttip», par animâ une riflessione su «Diminuzion e transizion ecologjiche vere, cemût prevignî lis vueris e cemût fondâ un ordin mondial di pàs?». La convigne e tacarà a 18.30 di miercus ai 2 di Novembar, li dal ambient «Birrastore» di viâl Vât (n. 64), a Udin.

■ **FLUMISEL.** "Teatri-Educazion"

Insegnants, students universitaris, operadôrs sociâi e operadôrs teatrâi, ai 11 e ai 12 di Novembar, si dan dongje a Flumisel par cjapâ part al seminari su lis strategjii dal teatri in ambit educativ «DireFareVedersi». I arlêfs a saran guidâts di Claudia Pastorini e di Peppe Coppola, inviadâts de clape «Agita» pe promozion e pe ricercje de culture teatrâl te scuele e tal mont sociâl (www.agitateatro.it). Il fin al è chel di svilupâ tai corsicj competencis espressivis, didaticis, storichis e leterariis e su la comunicazion teatrâl. L'iniziativa e je prudelade dal Cumon di Flumisel e di Vile Visintine.

■ **JAVÀS.** Memoriis de Diaspore

Li dal «Palaçat» di Cjavàs, il «Museu de vite contadine Diogene Penzi» di San Vit dal Tiliment al à imbastît, in 13 sezions tematichis, il so «Museu da l'Emigrazion». La gjestion de esposizion e je curade di «Erpac», l'ent regionâl pal patrimoni culturâl, e a intint di prudelâ il program «Ammer», Archivi multimedial de memorie da l'emigrazion. Par prenotazions e visitis guidadis, si po telefonâ al numar 348 1304726. Cence prenotazion, il Museu al vierç sabide (15-17) e domenie (10-12 / 15-17).

Joibe 3	S. Just martar	Lunis 7	S. Ernest
Vinars 4	S. Carli Borromeo	Martars 8	S. Gofrèt vescul
Sabide 5	S. ts Martars di Aquilee	Miercus 9	Dedicazion de Basiliche L.
Domenie 6	XXXII Domenie vie pal an	Il timp	Brut timp



Il soreli
Ai 3 al jeve aes 6.55
e al va a mont aes 16.46.



La lune
Ai 8 Lune plene.

Il proverbi
Cui ch'al à robât une lire, al po robânt mil.
Lis voris dal mès
Si stin inviant viers la fin dal an, il frêt e l'umit
di chest mès no nus lassin fâ cetantis voris tal ort.
Tes zornadis plui bielîs, approfittat par netâ il terren.

Tesaur di gjoldi a plen

*I scandais di «Libera»
sul ûs sociâl
dai «Bens confiscâts»*

Di ch'è strade dal cuarantesim de Leç «Rognoni-La Torre, fate buine ai 13 di Setembar dal 1982 par giavâ des sgrifis dai mafios i Bens robâts midiant dai siei trafics stomeôs e par confidâju impen a gjestions sociâls e comunitariis, la federazion di clapis «Libera» e à publicât doi scandais ch'a tamesin «lis praticis di utilizazion sociâl dai Bens confiscâts» e il «stât de trasparenze dai Bens confiscâts tes Aministrazions locâls, seont la Leç 109 dai 7 di Març dal 1996».

I doi «dossier», ch'a puedin jessi lets su la rêt des rêts, si clamin «Fattiperbene», il prin (www.libera.it/schede-1592-fattiperbene), e «RimanDati», il secont (www.libera.it/schede-1569-rimandati).

Il quadri piturât al à dôs musis diferentis. Di une bande, e salte fûr la vitalitât «di un popul verzelât di clapis, di cooperativis sociâls e dal mont dal volontariât che, de Lombardia a la Sicilia, al è protagonist de trasformazion di Bens di «cosa nostra» e esclusifs in Bens comugnâi e condividûts». Fra i sogjets impegnâts tal recupar sociâl di chescj Bens, il prin puest ur va a lis Clapis (505), seguidis di Cooperativis sociâls (198) e di Ents gleseastics (58); 40 a son lis Rêts di fin e d'imprese, 33 i Ents publics, 26 lis Fondazions, 27 lis Scuellis, 16 i Grops scout, 16 i Consuarts di cooperativis, 15 lis Clapis sportivis, 6 lis Comunitâts e 5 Ents e Ordins professionâi.

Di ch'è altre bande, al ven a flôr che su mil e 76 Cumons, scrutinâts pal fat di jessi destinatariis di Bens confiscâts, 670 no publichin tal lûc internet istituzionâl ni la note dai Bens e nancje nissune informazion, cul 62% des Aministrazions implicadis che par chest cont a risultin fûr di regule. Fra lis 18 Regions talianis dulà che il



Il placat ch'al popularize il scandai di «Libera» sui Bens confiscâts, «Fattiperbene»

La Leç Rognoni-La Torre, che ur gjave ai mafios il malcjolet, e à finît 40 agns

procès partecipativ pal ûs sociâl dai ladroneçs mafios al è partît, magari cussì no, e mançe ancjemò la realtât furlane, cundut che i Bens confiscâts chenti a esistin e, al mancul una purizion, a risultin bielzà «destinâts» (al ven a stâi trasferîts a l'aministrazion publice par finalitâts istituzionâls o par finalitâts sociâls).

Il scandai «Fattiperbene» al pant cheste situazion: in Friûl-V. J., i Bens «in gjestion», tant a di ch'a restin tes mans di un aministradôr judiziari nomenât dal Tribunâl par vie che si spiete ancjemò che il judizi su la confische al sedi finît, a son 22; ma 37 a son i Bens confiscâts e «destinâts». Par priorte, a van zontadis 3 aziendis «in gjestion». La situazion nostrane e risulde indaûr insufficient, ancje cuant che si scrutine il scandai «RimanDati». Nissun dai sis Cumons regionâi che l'Agenzie taliane pe aministrazion e la destinazion dai Bens sequestrâts e confiscâts a la criminalitât organizade ur à destinât un Ben confiscât, ai 31 di Otubar dal 2020, nol risulde in regule cu la publicazion des informazions stabilidîs. La ricercje di «Libera» no

proferis i nons dai Cumons no trasparentis. In dut câs, par cognossi i Ents locâi ch'a àn vût in consegne Bens confiscâts, si po tamesâ lis notis dal lûc internet de Agenzie statâl (https://openregio.ansc.it/statistiche/visualizza/beni_destinati/immobili), dulà ch'a figurin i Cumons di Davian e di Spilimberc, tal Friûl concuardiês, e di Aculee, di Çarvignan, di Lignan, di Tresesin e di Udin, tal Friûl centrâl.

Mario Zili

Messe par furlan

A Udin, la Messe par furlan e ven cjantade sabide ai 5 di Novembar a 5 e mieze soresere, li de capele «de Puritât», daprûf dal domo (cun Radio Spazio che le trasmet sul moment). E compagnarà la celebrazion la corâl Cantori del Friuli Garzoni-Zardini di Udin. Al cjantarà messe pre G. Gabassi.

Tradizions furlanis dal mès

par cure di **Mario Martinis**

I PROVERBIS DAL MÈS

Diesim prin mès dal calendari, novembar al registre, a voltis, l'ultin clip ultin de Sierade (Istadele di Sant Martin) ma dal sigûr i prins frêts, tant che lis fiestis dal stes Sant Martin (11-XI) e po chês dabon plui decisivis di Sante Catarine (25-XI) e di Sant Dree (30-XI) a son tignudis «puartis dal unvier». A rivin plois condurantis, umit e fumatis in planure, brumis intes valadis di mont e in cualchi an ancje la prime nèf sui monts, intant che il soreli al continue a sbassâsi e cussì lis zornadis si scurtin simpri di plui a pro di gnots simpri plui lungjîs, fredis e fondis. Aromai la nature e pant duç i segns dal cediment: i ramaçs si dispuein e lis fueis coladis par tiere a tachin a disfâsi, i vidiçons e lis lidris parsore tiere a muerin, i ultins uciei a emigrin, i animâi a van tes covis. Finidis dutis lis voris agriculis, une volte, a novembar al tacave il timp des veglis che al lave indevant par dut l'unvier; dopo cene ator dal fogolar o inte stale, intant che i vielis a contavin storiis e liendis, i contadins a justavin imprescj o a fasevin zeis e sportis intant che lis feminis a filavin. Lis veis a duravin fin a San Josef, in març, par dut il timp che no si lavorave tai cjamps par vie dal frêt. Mès des gnespulis e dai prins cacos, te societât contadine

di une volte a la fin di novembar al tacave il timp just pal rituâl di copâ il purcit, che al dave la riserve di cjar a ogni famee par dut l'unvier.

- Novembar di buere, ucei inte voliere
- Novembar di fumate, bon timp al lasse
- A novembar si alce la fumate e i lasse il puest ae glace
- Novembar ploiois cjamp frutuôs, novembar glaçât mandî semenât
- I Muarts (2-XI) o che a justin o che a disjustin
- A Sant Martin (11-XI) ogni most al divente vin
- A Sant Martin si spine il vin
- A Sant Martin, il gran al va a mulin
- Ocjis, cjustinis e vin a son plats di Sant Martin
- Astât di Sant Martin, tre dîs e un frechenin
- A Sant Clement (23-XI) si finis di meti la siale e il forment
- Sante Catarine (25-XI), la nèf su la culine (
- Sante Catarine, il frêt par ogni aine (Sa
- Sante Catarine e mene il frêt cu la caretine
- A Sante Catarine si met sù la tabarine
- Cui che al vûl la ocje fine, le compri a Sante Catarine
- Di Sante Catarine a Nadâl, un mès biel avuâl
- A Sant Andree (30-XI) il purcit su la bree